

Fundacion Juan Mario Odor ta presenta:

E storia berdadero di Museo Numismatico Aruba

Cumpliendo 30 aña di existencia (Part 1)



Sr. Odor orguyoso di muestra su coleccion


ORANJESTAD (AAN): Den añanan cuarenta, Juan Mario Odor tabata un homber cu hopi energia y yen di gana di biba y conoce mas di mundo. Un homber cu pensamentonan demasiado avansa pa su epoca tratando di brasa mundo y purbando na haya mas hopi conocemento posibel. Su señora ta describie como un homber cu no por a para keto ni un momento. Den e afan aki el a cuminsa cu un hobby hopi inusual pa su epoca: Colecciona placa.

Un hobby cual a capta su interes for di cuminsamento di aña 50 y cu su pasion asina fuerte no ta nada straño cu el a pasa esaki pa su futuro generacion. Aki ta sigui bo guia historico di nos tesoro nacional: Museo Numismatico Aruba.

EMMASTRAAT, ORANJESTAD '50 - '60
Un temporada caminda Mario Odor tabata cana rond tur caminda pa purba haya placa di otro paisnan cual tabata interese masha hopi mes. E tabata bay waf di rey caminda cu e tabata acerca bishitantenan ariba barco como tambe e tripulante. Asina e tabata acumula placa di otro pais. Ta un tripulante di barco a dune un revista popular di Merca den cual el a logra haya un adres di coleccionista di placa na Merca. Mario tabata fungi sin e sa como embasahor pa Aruba ya cu e hasta tabata invita e bishitantenan y tripulante di barco pa su cas. Tur e placanan cu tabata acumula e tabata pone nan bou di un glas riba un mesa pa e shownan. Na 1954 Mario tabata planta mata den su cura

ora cu pa colmo el a topa cu dos moneda di siglo 17. Esaki tabata un señal pa Mario cu su destino ta pa colecciona placa, un Numismatico pues ariba e pida baranca chikito aki.

ZUIDSTRAAT 40, ORANJESTAD '60 - '70
Apesar cu Mario tabata un simpel ambtenaar di D.O.W. su storia y motivacion pa nos isla ta inmenso. Poco poco el a involucra su mes den e mundo di numismatica y haci hopi contacto den esaki. Tur e tempo aki el a sigui dedica na cumpra placa pa haci su coleccion mas grandi y mas interesante. Na 1967 el a converti e comedor di su cas situa na Zuidstraat 40 den un exposicion. Esaki tabata algo hopi importante pa Mario ya cu semper e tabata kier a comparti su coleccion cu tur hende cu tabata interesa den esaki asina el a cuminsa ricibi



bishita di turista den su cas pa muestra nan su bunita coleccion. Mester menciona cu aki ta temporada cu su yiu homber Ruben Odor tampoco por a resisti e tentacion y na un edad hopi hoben, apenas 18 aña, e ta cuminsa colecciona hunto cu su tata.

MACUARIMA 52, STA. CRUZ '70 - '80

Mario su coleccion a crece y su cas na Zuidstraat a bira mucho chiquito y el a dicidi di muda pa un cas mas grandi, Macuarima 52. Tambe e coleccion di placa di Mario a cuminsa haya atencion special di politiconan. Muy en especial di Sr. Betico Croes cu a mira e posibilidad pa haci di e coleccion di Mario un atraccion turistico pa Aruba. Dos homber cu ideanan avansa a dicidi pa haci di e coleccion un Museo. Mester



Museo Macuarima a ser inaugura door di Sr. Betico Croes (qepd)

bisa cu gobierno no tabata sa precisamente kico pa haci cu e coleccion y cu Mario Odor. E idea tabata pa gobierno sostene e coleccion su gastonan pa asina Mario por exhibi su coleccion na nos bishitantenan. Porfin na 1975 Betico Croes ta inaugura e promer Museo di Aruba. Akinan ainda Mario mester a traha na D.O.W. y su señora y su yiunan tabata ricibi e bishitantenan di e Museo. Algo cu ainda famia Odor ta

haciendo fielmente; Expone su coleccion na tur esnan cu kier mira esaki. Mester bisa cu durante e temporada aki un grupo grandi di coleccionista di American Numismatic Association a tene nan annual meeting na Americana Hotel pa asina duna Mario Odor su reconocimiento den mundo di Numismatico. Esaki ta parti di historia di Museo Numismatico cu no mester lubida pasobra esaki ta parti di su desaroyo.